

# SAN PABLO ITLATITLANIL IN DIOS OKITLAJKUILILIJ IN FILEMÓN

---

## **Pablo okitlajkuililij in Filemón**

<sup>1</sup>Nej niPablo, nitzaktok telpiloyan, nitzaktok porke niktekipanoa in Cristo Jesús. Nikaj iwan tokni Timoteo iwan san sekan timitztlajkuililiaj tejwatzin titotetlasojkaikni Filemón, tejwatzin noijki titekipanoj ken tejwan. <sup>2</sup>Noijki tiktlajkuililiaj in tokni siwatl Apia, iwan tokni Arquipo katlej kajki kej soldado de Dios ken tejwan noijki tikatej. Iwan noijki tikintlajkuililiaj nochtin in tokniwan tiopantlaneltokakej katlej mololoaj mochan. <sup>3</sup>ToPapan Dios iwan toSeñor Jesucristo ma amechtiochiwa iwan ma amehmaka yolosewilistle.

## **Pablo okijtoj kuale tlaneltoka in Filemón iwan kuale tetlasojtla**

<sup>4</sup>Nochipa niktajsojkamachilia noTeko Dios nijkuak nimitzelnamiki itech notiotzajtzilis tejwatzin Filemón, <sup>5</sup>porke nechilwiaj nik tikpia tlasojtlalistle iwan tlaneltokalistle inawak toSeñor Jesús, iwan innawak nochtin katlej iaxkawan Dios. <sup>6</sup>Niktajtlanilia toTajtzin Dios ke nochtin katlej otikintlaneltokitij ika motlaneltokalis, ma kuale kimomakakan kuenta nochi in tlatochiwalistle katlej Cristo Jesús otechmakak. <sup>7</sup>Tejwatzin nokni, motlasojtlalis nechmaka miek pakilistle iwan yolosewilistle porke ika otikinyolchikaj in tokniwan katlej iaxkawan Dios.

## **Pablo okitlajtlanke se favor para yen Onésimo**

<sup>8</sup>Por yonik, maski inawak Cristo nikpia derecho komo nitlatitlanile para nimitznawatis tlan moneki tikchiwas, <sup>9</sup>okachi kuale nikneki nimitztlajtlanilis ika tlasojtlalistle. Nej, niPablo, ya nitetajtzin iwan axan nitzaktok telpiloyan por yen Jesucristo. <sup>10</sup>Nimitztlatlawtia por yen Onésimo, katlej omochij kej nokone porke oniktlapowij de itlajtol in Dios nian kan nitzaktok iwan yej okineltokak.

<sup>11</sup>Achtoj, itech nekatej tonaltin, Onésimo oyeka se tlanamaktle katlej mach itlaj owelia okichiwaya iwan mach owelia omitzpalewiaya, pero axan yej kuale nechpalewia iwan tejwatzin noijki kuale mitzpalewis.

## FILEMÓN

<sup>12</sup>Nimitztitlanilia oksemi in Onésimo, katlej sa tekítl níktlasojtla. Kuale xíkresibiro kej yeskia yen nej tinechresibiroa. <sup>13</sup>Nej níknekiskia nian ma mokawa nowan para ma nechpalewijto ma mitzpatkayoti, mientras nian nitzaktok telpiloyan por yen kuale tlajtole katlej temakixtia. <sup>14</sup>Pero mach itlaj níkneki níkchiwas tla tejwatzin mach mitzpaktia. Tlan nej nimitztlatlawtia xíkchiwa, xíkchiwa ika mopakilis, mach níkneki xíkchiwa tla tejwatzin amo tikneki. <sup>15</sup>Xamo omítzcholilijka in Onésimo kanaj keski tonale para satepan mowan yetos íktlanke (ík tlami), <sup>16</sup>pero axan mach ok tikpias kej se tlanamaktle, sino kej itlaj katlej okachi kuale iwan amo kej tlanamaktle, kíjtosneki kej se motetlasojkaikni. Nej sa tekítl níktlasojtla, pero tejwatzin moneki okachi xíktlasojtla, amo san kej yeskia tíktlasojtla akaj oksé tlakatl sino moneki tíktlasojtlas kej se tokni inawak toSeñor.

<sup>17</sup>Ijkón kiné, tla melawak tikyejyekoa ník tise pantekipanojkej inawak Dios, xíkresibiro in Onésimo kej yeskia yen nej tinechresibiroa. <sup>18</sup>Tla itlaj omítztoktij mach kuale, o noso tla itlaj mitzwikilia, nej nimitztlaxtlawilis. <sup>19</sup>Nej, niPablo, níkiykuiloa yin amatl ika noma, para íjkón noijki xíkmati ník yen nej nimitztlaxtlawilis tla itlaj mitzwikilia in tokni Onésimo, maski welis nimitzelnamiktis ník in tejwatzin noijki tinechwikilia asta yen moanima. <sup>20</sup>Ijkón kiné, nokni, nimitztlatlawtia xinechchiwili yin tlan nimitzilwia porke tej titlaneltokak inawak toSeñor. Xinechmaka pakilistle ípan noyolo porke tejwatzin tinokni inawak Cristo.

<sup>21</sup>Nimitztlajkuililia porke níkmati ník tikchiwas tlan nimitztlajtlanilia, iwan kuale níkmati ník tikchiwas asta okachi de tlan nimitztlajtlanilia.

<sup>22</sup>Noijki xikyektlali se lugar kan nietos ompa mochan, porke níkchia ník in Dios amechnankilis ika namotiotzajtzilis para níkisas de íjtik yin telpiloyan, iwan nechkawilis ma niwia ma namechitati.

### **Oksekimej tokniwan noijki okontlajpalojkej in Filemón**

<sup>23</sup>Noijki mitzontlajpaloa in tokni Epafras, katlej nowan tzaktok porke yey noijki kitematiltia itlajtol in Cristo Jesús. <sup>24</sup>Noijki mitzontlajpaloaj in Marcos, Aristarco, Demas iwan Lucas, katlej nowan tekipanoaj inawak Dios.

<sup>25</sup>In toSeñor Jesucristo ma amechtiochiwa miek ípan namoyolo. Ijkón ma yeto.